



KPMG ehf.
Borgartúni 27
105 Reykjavík

Sími 545 6000
Fax 545 6001
Veffang www.kpmg.is

Fjármála- og efnahagsráðuneytið skrifstofa skattamála

Reykjavík, 3. júní 2020.

Umsögn um drög að reglugerð um tímabundna endurgreiðslu virðisaukaskatts af vinnu manna.

Fjármála- og efnahagsráðuneytið hefur birt til umsagnar framangreind drög að reglugerð. KPMG hefur kynnt sér efni draganna og sér ástæða til að koma á framfæri eftirfarandi ábendingum og tillögum.

Í b-lið 4. gr. reglugerðardraganna er í sjö töluliðum kveðið á um skilyrði endurgreiðslu samkvæmt g- og h-liðum 1. gr. þeirra. Rétt til slíkrar endurgreiðslu hafa mannúðar- og líknarfélög, íþróttafélög, björgunarsveitir, landssamtök björgunarsveita og slysavarnadeilda og einstaka félagseiningar þeirra.

Í 1. tölul. b-liðar 4. gr. er gert að skilyrði að mannvirki, eða sérgreindur hluti þess, sé alfarið í eigu umsækjanda. KPMG bendir á að mannvirki kann að vera í eigu tveggja eða fleiri félaga eða samtaka sem uppfylla skilyrði til endurgreiðslu. Í orðunum „alfarið í eigu umsækjanda“ felst óvissa sem ástæða er til að eyða. Orðið umsækjandi er hér í eintölu og eftir orðanna hljóðan er gert að skilyrði að mannvirki sé alfarið í eigu þess eina umsækjanda. KPMG leggur til að á eftir tilvitnuðum orðum verði aukið innskotssetningunni; eða umsækjenda ef mannvirki er í eigu tveggja eða fleiri umsækjenda sem uppfylla skilyrði til endurgreiðslu skv. g-h liðum.

Í 2. tölul. b-liðar 4. gr. er gert að skilyrði að mannvirki, sem umsókn tekur til, sé að yfirgnæfandi hluta nýtt í þágu meginstarfsemi umsækjanda. KPMG bendir á að mannvirki kann, auk nýtingar í þágu eiganda þess, að vera nýtt í samsvarandi starfsemi annars félags eða samtaka af sama toga. KPMG legur til að við 1. málslíð töluliðarins verði aukið orðunum; eða samsvarandi skilgreindirar meginstarfsemi annars eða annarra mannúðar- og líknarfélaga, íþróttafélaga, björgunarsveita, landssamtaka björgunarsveita eða slysavarnadeilda og einstaka félagseininga þeirra.

Í 2. tölul. b-liðar 4. gr. er tiltekið að tilfallandi útleiga girði ekki fyrir rétt til endurgreiðslu. KPMG er ekki fullljóst hvað átt er við með tilfallandi útleigu. Í 8. tölul. 3. mgr. 2. gr. laga nr. 50/1988, um virðisaukaskatt, er gerður greinarmunur á fyrsta lagi fasteignaleigu, í öðru lagi gistipjónustu og í þriðja lagi skammtíma sölu á aðstöðu fyrir veitingar og samkomur. Í skattframtækni hefur hugtakið fasteignaleiga verið skýrt svo að það taki til réttarsambands sem húsnæðing nr. 36/1994 gilda um, þ.e. veitingu víðtæks afnotaréttar af húsnæði í skemmst 30 daga. Gistipjónusta er leyfisskyld starfsemi samkvæmt lögum nr. 85/2007, um veitingastaði, gististaði og skemmtanahald. KPMG dregur í efa að fasteignaleiga eða gistipjónusta geti fallið undir tilfallandi útleigu. Eftir virðist því standa að með þessum orðum sé átt við aðstöðusölu. Miðað við þann skilning leggur KPMG til að í stað orðanna „Tilfallandi útleiga“ komi: Tilfallandi sala á aðstöðu til samkomu-, ráðstefnu- eða sýningarhalds.

Í 7. tölul. b-liðar 4. gr. er tiltekið það skilyrði fyrir endurgreiðslu að umsækjandi sé ekki í vanskilum vegna opinberra gjalda eða afdreginna lífeyrisciðgjalda. Gerð er krafa um að umsækjandi leggi fram staðfestingu

innheimtumanns ríkissjóðs á skuldastöðu. Umsókn um endurgreiðslu skal beint til embættis ríkisskattstjóra, sem jafnframt er einn af innheimtumönnum ríkissjóðs. KPMG þykir það kyndug krafa af umsækjandi þurfi að afla vottorðs frá innheimtumanni ríkissjóðs til að leggja fyrir innheimtumann ríkissjóðs og leggur til að þessi krafa verði felld brott.

Virðingarfyllst,

KPMG ehf.

